

Celebracion di Dia Mundial di Poesia y cumpleaño di sra. Maybelline Arends-Croes



ORANJESTAD – Siman pasa, Biblioteca Nacional Aruba conhuntamente cu Departamento di Cultura Aruba (DCA) y Instituto Pedagogico Aruba (IPA) a duna balor y contenido na e Dia Internacional di Poesia.

E promotor cultural tras e iniciativa aki, sr. Mirto Lacle a elabora un programa masha atractivo y varia combina cu poesia, musica, declamacion, reconocimiento y te hasta celebracion di cumpleaño. E no solamente e tabata un fecha mundial pa Aruba uni su mes na e Dia Internacional di Poesia, sino tambe na otro celebracion stipula riba kalender di Organisacion di Nacionnan Uni (ONU) manera: Dia Internacional pa Eliminacion di Discriminacion Racial; Dia Internacional di Awa y Dia Internacional di Mondí y Matanan, y Dia Internacional di Teatro.

Dia Internacional di Poesia

Den conexion cu Dia Internacional di Poesia tabatin declamacion di sra. Ruth



Vrieswijk-Bergen kende a declama “Mi Pen Dos”; sra. Yosmar Sneek y su poema “Mi Isla Natal” y sra. Digna Lacle-Herrera y su poema “Un Canto pa Nos Escudo”. Un invitado special cu a bin fei nos isla bisiña Corsou tabata sra. Roselyn Jobse Jessulum kende a bin cu un combinacion di poesia ritmico y poesia canta kende a wordo acompaña pa sr. Samuel Dumfries pa medio di instrumentonan musical.

Durante un breve entrevista, sra. Roselyn Jobse Jessulum a referi na su forma di haci poesia. “Inspiracion ta drenta sea

cu ritmo of muziek y melodía”. El a relata cu loke el a trece e anochi ey ta obra di su buki ultimo y e tabata masha honra cu Samuel por a compaña musicalmente. E mes ta toca guitarra, piano, conga y bongo y e mes ta compaña su poemanan di forma ritmico. Igualmente a declama Ricardo Wever su poesia “Hunto nos por celebra”; Shailiny Tromp-Lee su poesia “Herencia textual transforma den amor berdadero y fenomenal”; Luigi Croes y su poesia “Nos Dushi Aruba ta di fiesta” y Richard Dabian y su poesia “Dialogo entre flor”.

Musica y celebracion

Tambe tabatin presentacion di e Grupo Rondalla Universo Aruba integra magistralmente pa 14 guitarrista y cantante bou e guia di sr. Frank Croes. Nan a interpreta cantica manera e tradicional Cumpleaño y Aura pa asina celebra cu bolo y biña un aña mas di bida di Maybelline Arends-Croes. Maybelline su grupo coral di seis cabayero “Melange” a uni na e celebracion aki cu interpretacion di e canticanan “Maravioso” composita pa sr. Micheal Kuiperi; y “Luna di Plata” bou letra di sr. Lio Booi (dfm) y sra. Maybelline Arends y canta dor di

e maravioso bos di Edjean Semeleer.

E actividad cultural aki a conta tambe cu presentacion di Anaisa Orman y grupo Gucci-dancers bou guia di e multi-facetico activista cultural, John-Freddy Montoya. E anochi aki tabata uno sublime y inolvidabel cu presencia di sr. Alwin Toppenberg kende a checuta riba piano obranan magistral manera “Anette” di Rufo Wever; y obranan di su mesun creacion manera “Padu del Caribe 90 aña y “Much’i scol”. □

